

中國方志叢書·華中地方·第八四四號

據

清·陳廷枚等修，熊曰華等纂
清乾隆二十五年刊本

影印

江 西 省

袁州府志



成文出版社有限公司印行

中華民國七十八年三月臺一版

袁州府志

共四冊

發行人：黃

成

助

台北郵政信箱二二六〇五號

出版者：成文出版社有限公司

台北郵政信箱二二六〇五號

台北市南京東路三段270號9F

電話：七四一五四三二一九

印刷者：上林彩色印刷有限公司

台北市大理街145號

新聞局出版登記證：局版台業字第一一四三號

本書承

東洋文庫提供所藏稿本

謹誌並致謝忱

袁州府知府陳廷枚重輯

藝文記下

重建衛碑記

譚九齡

皇明誕膺天命撫有海宇神武之功超邁千古四方既平
爰定兵制以馭內外京師天下之首也既設重兵以固基
本郡縣手足也凡形勝衝要之地亦置兵控制使大小相
維中外相應臨事調用則綱張目舉有條不紊所以播
下於泰山之安而定千萬世之鴻業也袁居江西上游連
接湖廣自昔爲藩郡歲丙午始命歐文顯爲僉事開衛置

司俾十有二千戶所隸焉明年千戶韋富以功陞僉事繼陞副使時征討方殷公署未立洪武改元韋侯始建公宇治事而一時權宜未盡如制三年朝廷以天下大定論賞功臣韋後擢陞同知而淮西王侯仍濟寧馬侯英來會衛事二侯久歷兵務至則議新政令而舊所隸兵悉分代閔建惟千戶王用所轄千人存焉會朝廷籍兵士之餘丁義屬者爲兵三侯閱其壯勇者二千人以聞明年命下增設千戶百戶等以率之併舊兵分爲左右中三千戶所自是兵勢益勝迺新政令增城浚壕築飛樓營串房立屯由造輕舸凡戰守之具靡不畢舉暇則引士卒躬訓練旌旗衣

侯領南昌撫州永衛及袁之兵討平之師方旋而南康復有以妖言構亂者馬侯承命往征之侯善用人獲其渠魁餘黨就解五年宜春侯黃公奉命征辰沅五溪蠻王侯復行侯前詢知溪峒之俗設策掩擊之以故東西千里烟塵廓清矧年穀屢稔士飽馬騰三侯乃謀曰國家以閫任分委將帥以宣威德而鎮方面也今公宇湫隘弗稱觀瞻宜改爲之廼命鳩工選材分職任事因以舊規而增廣之中爲治事之堂堂之旁爲贊政之幕後爲重堂以備籌策最後爲旗纛廟以奉軍牙之神廟之側神厨神庫宰牲池在

焉治事之前翼兩廡以分六曹前設儀門外爲曹門門之內左爲鎮撫廳右爲屋四楹以備僚屬之居自堂及門合用之器室無不備梁棟戶牖丹雘輝煌光彩耀目來者肅容經始於七年四月落成於十有一月工用之費皆三侯捐俸以給之分職田入以膳之暇則親臨授以成規故工善吏勤不誡而勸既成帝侯改遼之金川剏建始末久未有述今年秋二侯相謂曰公宇之成所以宣布威德也作而不紀何以示將來乎遂謀伐石以記請予惟自昔聖人經理天下未有不資於兵除暴定亂輯衆安邦又非威武而不能是以我朝視兵爲尤重任法任人斷自宸衷動而

當克成大業今袁得賢侯明國大體一德一心以承
剛毅智勇各盡所長其能外清邊防內修政令大新
而不遺餘力也非惟以表三侯盡職之美而已於國
法得人之盛皆可見焉後之居此者觀其功績之盛
勦治之勤尚有以續美於方來而袁民得依金湯之
享太平之樂者尚毋忘三侯之盛心也哉

新修學記

胡儼

袁州何侯澄過予言曰袁之儒學自唐天寶五載刺史
瑄始建於州之南乾元元年刺史鄭審移於城西宋皇祐
中祖無擇來知州事觀廟學陋隘乃改營於治之東北隅

即今處也國朝洪武辛亥郡守劉伯起建尊經閣復置四齋歲久敝壞洪熙改元郡守周鐸衛使石偉各捐俸新之時四邑官屬咸以其資來助越五年災僅存者尊經閣厨庫廩食之舍而已未幾澄忝郡寄釋菜之日有歎于中乃議興作於是積以歲俸勸導士民鳩工聚財陶甃輦石作正殿五間殿有像東西廡各七間廡有主大成門五間門有戟又作明倫堂五間翼以四齋始於宣德癸丑夏六月成於丁巳冬十月願公記之嗚呼郡守者民之師率其所以爲師率者必有其道焉亦曰治教而已治之具存乎人教之法本乎學我國家法先王稽古制自朝廷以至都邑

皆建學立師豈徒然哉爲生徒者宜體朝廷之至意與何
侯之盛心隆師親友亦曰務學而已學之道進德居業也
進德者日新居業者無倦日新者必遜志而時敏無倦者
必矯輕以警惰此聖賢之教亦豈出於日用彝倫之外况
袁之爲郡土俗愿樸士秀而文將見道德明秀之士出以
鳴世其所造就豈止於昔之盧肇榮一時夸一鄉也耶予
雖衰老尚當拭目何侯字彥澤毗陵人以朝著出守是邦
和易近民豈弟之化聞於遠邇云

重建三先生祠記

錢習禮

道之大原本於天用之在天下傳之在聖賢自堯舜至於

孔子至於孟子皆五百年或百有餘年而聖賢出故斯道之傳繩繩不絕自秦而降漢晉隋唐以及五季千數百年之久聖賢不作斯道不繼至宋興五星聚奎天啟文明大賢輩出時則有若濂溪周先生河南程氏兩先生皆以傳道爲已任圖之於書探造化之原明事物之理發往聖之所未發覺斯民之所未覺扶天常正人紀使斯道大明昭如日星其功與天壤相爲悠久可也天下學士翕然宗之故所在學校多闢祠室以祀焉袁之祠舊在學宮西偏地隘庫陋不足以示嚴奉之意比歲都御史韓公雍按部巡學謁拜祠下徘徊興歎亟命卽縣長貳與韓文公廟徙

宜春臺右一時並作制與廟稱左右列之肖像其中濂溪先生南向坐明道伊川先生東西向以侑焉郡之父老士民來觀者莫不稱慶然祠之設豈直爲觀美哉尊賢尚德而風勵之意存焉凡袁之士俛力於聖賢之學者歲時祭祀進拜跪奠近先生之親像而瞻仰之悠然興高山景行之思惕勵於中退而玩其圖誦其書咏其言存諸心蘊之而爲德行見之而爲事業斯無愧矣若徒淪溺於俗學之陋持之以取科第謀利祿釣聲譽不足以淑人心扶世教是則三先生之罪人而非公與郡縣之所期望也可不勉哉遂書爲記俾刻石而寘諸祠間以爲爾諸生觀省之助

云

重建秀江橋記

陳定

袁郡城北門外有秀江江有橋去府廨可二里許天順甲申夏四月洪水懷襄頽波潰決墩礮蕩析川逝靡遺永平劉公懋知袁州府始至覽橋圯壞狀喟然興歎謂昔王周爲刺史見橋壞覆民租車因引過償粟治其橋今吾蒞茲郡而橋梁不修責將安歸貳守莫公昂通守夏公繼先節惟常公琳皆聞而是之謀以克協遵故趾重建而揮使石公慨然解犀於時宜春知縣靳敏領其事悉力綜理

地帶由是民免病涉岸無卽須輒輾蹉蹉往來交迴利濟
之澤霈乎無窮越明年成墩醜水五道覆屋凡二十七楹
甓甃丹雘俱極縝壯其視舊制廣袤如之而堅緻有加既
而郡侯以事非細故命定記其後定屢謝以不斐不獲廼
記之曰惟橋梁之修王政之一事也子產以賢大夫聽鄭
國政一見涉溱輒以輿濟煦濡姑息至不能忍何邪先王
之道湮惟知栢恩而不以義制焉耳故孟子譏其惠而不
知爲政崔公建橋渭水百姓咸懷之又因以名之至今以
爲美談公道之在人心與其大德而不與其小惠固如是
哉今世逢主聖臣良王道復行爾袁得賢守政通公普下

皆率俾以佚使民勞而不怨抑所謂蕩蕩平平而不知者
與昔杜預橋成晉武臨會舉杯勸曰非卿此橋不立蓋政
平施普君用賞之則夫修橋梁者詎非王政之事與郡侯
之志其果在茲與使繼是者咸有侯之志則當行大政制
大義延其去思是豈惟郡邑民之祐抑亦爲守令者之度
定際其盛而欲引其道於永久廼撰其事以復厥命

重修浮橋記

曾宜勉

萬載縣古渡曰龍江曰竹渡邑之要津也龍江距邑二里
而遙竹渡則沂沭西上一舍而近上通潭鄂下通筠洪南
抵臨吉前元俱有橋以便濟涉壬辰兵變燬於火竹渡續

修未久而復壞龍江五十餘年未有能繼之者每春洪水
汪洋孤舟斷岸不無病涉之歎夫橋梁道路乃爲政之首
往往官於斯匪因簿書期會則迫賦稅逋徵奚暇於此洪
武壬午池之貴池舒君仲誠甫尹斯邑下車以來招流民
恤孤獨闢土田均賦役二載之間晏如也臨政之隙尤亟
於徒杠輿梁首修竹渡命僧文隱董其役始壬午冬訖癸
未春及修龍江命耆民郭文煥督之始壬午冬訖癸未春
衆先欲撤竹渡舊橋於龍江隨宜葺之稅大使鄭子謙請
曰盍若更新爲可久侯欣然從之主簿舒君永懷又力贊
之經費力役不勞於民而事斯舉橋皆載舟水面隨其闊

狹聯舟以濟貫以繩板其梁欄其側而石其兩岸傍立庵
舍擇民復其身守之規模朴固足以久遠車馬往來晨昏
馳驟若坦途焉橋之費也凡若干緡非哀衆施協力而侯
爲之倡孰能成哉衆請言書其事刻板於菴噫龍江竹渡
之有橋也成於我侯便於爾民凡偃僂而提攜負戴而奔
頓行者歌休息者不憂乎厲揭之勞誰之力歟歷兵燹暨
今寒暑代謝凡若干載又始成之誰之力歟是皆侯之善
政也宜記之以貽後世使繼此以爲縣者皆能行其政若
我侯則龍江竹渡之不朽豈可以世數記哉

分宜縣重修儒學記

汪諧